

Broj: 01-02-953/23

Sarajevo, 20.03.2023. godine

Z A P I S N I K
2.REDOVNE SJEDNICE PREDSTAVNIČKOG DOMA PARLAMENTA FEDERACIJE
BiH, održane 15.03.2023. godine

Sjednica je počela u 10.22.

Sjednicom je predsjedavala predsjedavajuća Mirjana Marinković-Lepić.

Predsjedavajuća Marinković-Lepić pozdravila je zastupnice i zastupnike, goste kao i predstavnike akreditiranih medijskih kuća koji prate rad sjednice.

Odsustvo sa sjednice opravdali su: Drago Stanić, Melika Mahmutbegović, Miralem Galijašević i Adnan Delić.

Prema evidenciji Stručne službe, predsjedavajuća je konstatovala da sjednici prisustvuje dovoljan broj zastupnika za kvalitetan rad i odlučivanje.

Zapisnici 2., 3. i 4. vanredne sjednice usvojeni su bez primjedbi.

Zastupnička pitanja

Mario Karamatić kazao je da nije dobio odgovor od premijera na pitanje koje je postavio vezano za penzije.

Pitanje je uputio ministru Dediću, a vezano za zapošljavanja osoba koje su završile Medresu, u Federalnom ministarstvu poljoprivrede, vodoprivrede i šumarstva a vezano za srodnost predmeta koji se izučavaju u toj školi sa ovim Ministarstvom.

Nijaz Helez pitanje je uputio Federalnom ministarstvu energetike, rudarstva i industrije a tiče se dešavanja u Rudniku uglja Gračanica, Gornji Vakuf-Uskoplje - ko je odgovoran i kolika je šteta nastala usljed klizišta? Da li su planirane količine komercijalnog uglja utjecale na ovo što se dešavalo? Ima li pretpostavki da je puno više komercijalnog uglja iskopano, nego što je planirano, pa da su se desila ova klizišta?

Adisa Kokić-Hinović pitanje je uputila Federalnom ministarstvu zdravstva, koji traži detaljnu informaciju o fazama postupka primjene i aktuelnim koracima nadležnih institucija, vezano za Zakon o liječenju neplodnosti biomedicinski potpomognutom oplodnjom u Federaciji BiH, koji je stupio na snagu 01.01.2023. godine. Kada se očekuje javni poziv za klinike i nakon toga za parove, kada će biti javni poziv za članstvo u nadležnoj komisiji obzirom da ističe mandat prethodnoj, koliko je Zavod zaprimio prijave od strane parova iz Federacije BiH i na koji način će se tretirati, s obzirom da još nisu objavljeni javni pozivi.

Safet Omerović pitanje je uputio Federalnom ministarstvu energije, rudarstva i industrije i Federalnom ministarstvu poljoprivrede, vodoprivrede i šumarstva a vezano za projekat izgradnje Hidroelektrane Ulog u gornjem toku rijeke Neretve. Imaju li ova ministarstva zvanične informacije o ovom projektu i ima li ikakve koordinacije resornih entitetskih ministarstava? Da li su federalna ministarstva išta poduzela kako bi bila uključena u ovaj projekat jer isti ima utjecaj na tok Neretve. Pokreće inicijativu, kojom traži od Vlade FBiH da poduzme sve aktivnosti da se Federacija BiH uključi u praćenje realizacije ovog projekta i zaštitu ovih interesa.

Petar Galić ponovio je pitanje HT Eronetu d.d. Mostar, u vezi sponzorstva kulturnih i sportskih događaja u Federaciji, jer nije dobio odgovor.

Drugo pitanje uputio je Vladi FBiH, odnosno sekretarijatu i Federalnom ministarstvu zdravstva - zbog čega nisu izvršili zakonsku obavezu imenovanja članova vijeća ispred Kantona 10 za Sveučilišnu kliničku bolnicu Mostar.

Alma Kratina osvrnula se na već usvojenu inicijativu za formiranje Vijeća za djecu, te pita resornog ministra i premijera, zašto ovo tijelo do sada nije formirano?

Drugo pitanje odnosi se na implementaciju Zakona o roditeljima njegovateljima, te traži informaciju od Vlade FBiH o dinamici isplate naknada roditeljima njegovateljima.

Podsjetila je na zaključak usvojen u Parlamentu, a vezano za Zakon o zdravstvenom osiguranju i pitanje statusa studenata koji do 26 godine ne završe fakultet, a redovni su studenti, te pita ministarstvo kada ćemo imati riješeno ovo pitanje?

Edita Mazić prvo pitanje uputila je JP Elektroprivreda BiH - kolika je planirana i ostvarena proizvodnja po mjesecima u zadnje četiri godine Rudnika uglja Kreka i Rudnika uglja Đurđevik? Šta će poduzeti menadžment Elektroprivrede u smislu pomoći i podrške u podzemnoj eksploataciji Rudnika Đurđevik. Traži da Elektroprivreda konkretno reaguje po ovom pitanju.

Sljedeće pitanje uputila je Federalnom ministarstvu okoliša i turizma – da li će i u ovoj godini građani imati na raspolaganju vaučere za odmor na nekoj od destinacija unutar Federacije BiH a koje je prošle godine odobrila Vlada Federacije BiH.

Naredno pitanje uputila je Zavodu PIO – zašto se ne poštuje zakonski rok za rješavanje zahtjeva za penzije i postoje li mjere nadzora nad istim? Koliko građana čeka na rješenje za ostvarivanjem prava na penziju? Traži tačan datum podnošenja tog zahtjeva za svakog osiguranika koji čeka duže od propisanog roka, u skladu sa Zakonom o upravnom postupku.

Haris Silajdžić pitanja je uputio Vladi Federacije BiH i Federalnom ministarstvu energije, rudarstva i industrije – u kojoj fazi je proces uspostave sistema za izdavanje garancija porijekla i potpisa ugovora sa Grexel kompanijom koja je razvila sistem za gore navedene operatore za obnovljive izvore energije? Šta su prepreke za potpis ugovora sa ovim pružateljem usluga, budući da sekretarijat energetske zajednice izvještava da je jedini preostali korak potpis navedenog ugovora.

Elzina Pirić postavila je pitanja Vladi FBiH i Federalnom ministarstvu energije, rudarstva i industrije i Upravi Elektroprivrede BiH – traži da joj se dostave finansijski izvještaji svih rudnika Federacije BiH i sedam rudnika u koncernu Elektroprivrede i Rudnika Banovići, s posebnim osvrtom na obaveze prema dobavljačima i kumulativnom dugovanju. Traži da joj se dostavi broj zaposlenika kao i zapošljavanje u protekle dvije godine, struktura primljenih radnika u svim rudnicima u Federaciji BiH, sedam rudnika koncerna i Rudnik Banovići. Traži da joj se dostave sve odluke Nadzornog odbora, ako postoje o stečaju, o kome se govori u Rudniku uglja Kreka i Rudniku mrkog uglja Zenica, te na osnovu čega su donesene takve odluke. Traži da joj se dostavi obrazloženje, zašto su raspisani tenderi za korištenje privatnih mašina u rudnicima u Federaciji u milionskim iznosima i to u sedam rudnika koncerna i Rudnika mrkog uglja Banovići posebno dokumentaciju na aktuelni tender u Rudniku Đurđevik od 67 miliona KM.

Dennis Gratz dva pitanja uputio je Zavodu za zdravstveno osiguranje i reosiguranje Federacije BiH i Federalnom ministarstvu zdravstva a tiču se djece oboljele od dijabetesa tip 1 koja ostvaruju pravo na glukometar i trakice za mjerenje šećera u krvi preko Zavoda zdravstvenog osiguranja i reosiguranja. Kazao je da nabavljeni aparati nisu pouzdani pri mjerenju šećera u krvi, te su roditelji primorani kupovati pouzdanije aparate i trakice – koji je trenutno status ugovora o nabavi aparata za mjerenje glukoze u krvi i što sprječava mjerodavne institucije ukoliko su primjedbe točne da raskine ovaj ugovor i nanovo raspiše javni poziv za nabavu funkcionalnih trakica i medicinskih sredstava.

Kenela Zuko pitanje je uputila Federalnom ministarstvu za pitanja boraca – koliko je prema evidencijama u Jedinostvenom registru boraca Armije RBiH živih žena pripadnica Armije RBiH. Traži da joj se dostave imena i prezimena kao i mjesto prebivališta kako bi se mogle pokretati inicijative po pitanju njihovih prava.

Pokrenula je inicijativu prema Federalnom ministarstvu obrazovanja i nauke da u skladu sa svojim mogućnostima uputi inicijativu prema kantonalnim ministarstvima za obrazovanje, kako bi uveli u srenje tehničke škole smjer zanimanje KV pirotehničar, odnosno da ministarstva imaju uvid u prisustvo ovog smjera kao i da se razmotri školovanje stručnog kadra.

Eldar Čomor pokrenuo je inicijativu prema Vladi FBiH da se u rebalansu Budžeta FBiH osiguraju sredstva za popunjavanje neophodnih sistematiziranih radnih mjesta u Federalnoj upravi za inspeksijske poslove.

Mirsad Čamdžić izrazio je nezadovoljstvo jer nije dobio odgovor kojeg je uputio premijeru Novaliću a vezano za utrošenih milion KM za promociju Vlade FBiH.

Hajrudin Žilić postavio je pitanje Federalnom ministarstvu zdravstva - da li je akademsko zvanje magistar ekonomije iz oblasti menadžemnta, odnosno postdiplomski studij iz Zdravstvenog menadžmenta komplementaran sa jednim od posebnih uslova iz konkursa za imenovanje direktora domova zdravlja.

Pokrenuo je inicijativu prema predsjedavajućoj Doma da se osigura još jedan parking prostor za zastupnike za vrijeme održavanja sjednica.

Sanel Kajan pokrenuo je inicijativu prema Vladi FBiH za donošenje i provđenje Odluke o izgledu tabli odnosno ploča na javnim ustanovama, kojima je osnivač Federacija Bosne i Hercegovine.

Admir Čavalić ponovo je postavio pitanje na koje nije dobio odgovor a vezano zagađenost flaširanih voda na području Federacije Bosne i Hercegovine.

Naredno pitanje vezano je za utrošak milion KM na promociju Vlade FBiH , te je tražio imena osoba i preduzeća koja su dobila taj novac.

Pokrenuo je inicijativu prema Vladi FBiH, da Union banka otvori svoje poslovnice u općinama na području Federacije BiH gdje ne postoje banke u saradnji sa Vladom FBiH.

Pokrenuo je inicijativu prema Vladi FBiH i Federalnom ministarstvu pravde, da se dodatno zaštite novinari zviždači na području Federacije BiH.

Narednu inicijativu pokrenuo je prema Federalnom ministarstvu raseljenih osoba i izbjeglica da se uspostavi sistem za obavještanje raseljenih osoba i izbjeglica na području entiteta RS u vezi bilo kakvih promjena koji mogu utjecati na status tih osoba.

Amir Purić pitanje je uputio premijeru Novaliću i ministrici Milićević – koliko sredstava je u prošloj godini uplaćeno za uvezivanje radnog staža radnicima iz preduzeća sa većinskim državnim kapitalom.

Naredno pitanje postavio je Federalnom ministarstvu zdravstva – koliko osoba se nalazi na listama čekanja za transplantaciju organa u Federaciji BiH i šta je prepreka da se u transplantacionim centrima u Federaciji vrši veći broj transplantacija. Također, poziva sve da se, ukoliko se to ne kosi sa njihovim vjerskim ili nekim drugim uvjerenjima prijave za donorsku karticu.

Slaven Raguž pitanje je uputio Federalnom ministarstvu zdravstva i Zavodu zdravstvenog osiguranja i reosiguranja FBiH – zašto je snabdijevanje citostaticima u bolnicama diljem Federacije BiH neredovna, odnosno zašto veliki broj onkoloških pacijenata nije primio svoje terapije na vrijeme.

Naredno pitanje uputio je Federalnom ministarstvu poljoprivrede, vodoprivrede i šumarstva i Federalnom ministarstvu pravde - koje aktivnosti su poduzete po pitanju utvrđenih propusta i nepravilnosti, po pitanju zakupa i raspolaganja državnim zemljištem u Općini Odžak a utvrđen je od strane Federalne uprave za inspekcijske poslove. Šta su ova dva ministarstva uradila po pitanju nalaza inspekcije koja je utvrdila netransparentnost i propuste po pitanju zakupa zemljišta.

Pokrenuo je inicijativu prema Federalnoj upravi za inspekcijske poslove da urade hitan inspekcijski nadzor površinskog kopa Dimnjače Rudnika lignita Gračanica Gornji Vakuf –Uskoplje zbog klizišta i urušavanja tla, s kojim su ugrožene i porodične kuće.

Pokrenuo je inicijativu prema Federalnom ministarstvu pravde, da postupi po izjašnjenju Vlade FBiH od 06.10.2022. godine, a tiče se izrade i donošenja Zakona o dopuni Zakona o utvrđivanju naseljenih mjesta u određenim općinama, a vezano za inicijativu mještana naselja Drapnići, koje se nalazi u sastavu Podorašja kao jedinica mjesne samouprave Grada Srebrenika. Vlada FBiH i Odbor za pravdu i opću upravu dali su pozitivno mišljenje, te traži od resornog ministarstva da do sljedeće sjednice pripremi Nacrt ovog Zakona i da bude na dnevnom redu.

Aner Žuljević pokrenuo je inicijativu prema Vladi FBiH i resornom ministarstvu, a vezano za plućnu hipertenziju i lijek Adempas koji se nalazi na Federalnoj listi lijekova isključivo za djecu, te traži da se proširi i za odrasle kroz Federalnu listu lijekova za Fond solidarnosti.

Sandi Salkić pokrenuo je inicijativu ispred klubova zastupnika NES, Stranke za BiH i PDA, Etičkoj komisiji za ispitivanje odgovornosti zastupnika Halila Bajramovića a usljed jučerašnjeg događaja, u kojem je zastupnik Bajramović u Hotelu Holiday fizički nasrnuo na Sulejmana Samardžića savjetnika premijera Unsko-sanskog kantona. Upućuju inicijativu i zahtjev prema Etičkoj komisiji da u skladu sa Poslovnikom i Etičkim kodeksom zauzmu svoj stav.

Prešlo se na utvrđivanje dnevnog reda.

U raspravi o izmjenama i dopunama dnevnog reda učestvovali su: Mario Karamatić, Ivica Šarić, Mahir Mešalić, Almedin Aliefendić i Amir Ibrović.

Prijedlog Vlade FBiH da se u dnevni red uvrsti tačka - Prijedlog Zakona o porezu na dohodak, nije usvojen (24 glasa za, 31 glas protiv i 22 uzdržana glasa).

Prijedlog Vlade FBiH da se u dnevni red uvrsti tačka - Prijedlog Zakona o doprinosima, na osnovu pojedinačnog izjašnjavanja nije usvojen (32 glasa za, 16 glasova protiv i 34 uzdržana glasa).

Prijedlog Vlade FBiH da se u dnevni red uvrsti tačka – Strategija poljoprivrede i ruralnog razvoja 2021.-2027. godina nije usvojen (32 glasa za, 16 glasova protiv i 34 uzdržana glasa).

Prijedlog zastupnika Almedina Aliefendića da se u dnevni red uvrsti tačka - Nacrt Zakona o javnom okupljanju nije usvojen (31 glas za, 20 glasova protiv i 33 uzdržana glasa).

Prijedlog zastupnika Amira Ibrovića da se u dnevni red uvrsti tačka – Deklaracija o protivljenju inkriminaciji verbalnog delikta nije usvojen (33 glasa za, devet glasova protiv i 42 uzdržana glasa).

Prijedlog Kluba zastupnika DF da se u dnevni red uvrsti tačka – Smjena/razrješenje predsjednice entiteta Federacije BiH Lidije Bradara, na osnovu pojedinačnog izjašnjavanja nije usvojen (32 glasa za, 51 glas protiv i dva uzdržana glasa).

Prijedlog Kluba zastupnika DF da se u dnevni red uvrsti tačka – Smjena/razrješenje predsjedavajuće Predstavničkog doma Parlamenta Federacije BiH Mirjane Marinković-Lepić, nije usvojen (29 glasova za, 48 glasova protiv i tri uzdržana glasa).

Prijedlog Odbora za energetiku, rudarstvo i industriju da se u dnevni red uvrsti tačka –Informacija sa prijedlogom zaključka o davanju prethodne saglasnosti u postupku izdavanja Energetske dozvole za izgradnju VE „Tušnica“ Privrednom društvu Winter Wind d.o.o. Tomislavgrad, usvojen je sa 53 glasa za, tri glasa protiv i 24 uzdržana glasa.

Prijedlog zastupnika Ivica Šarića da se sa dnevnog reda skine tačka – Prijedlog Odluke o dopuni Odluke o donošenju Prostornog plana područja posebnih obilježja od značaja za Federaciju BiH „Autocesta na Koridoru Vc“ za period od 20 godina, usvojen je sa 50 glasova za, 11 glasova protiv i 14 uzdržanih glasova.

Sa 63 glasa za, bez glasova protiv i 21 uzdržani glas, usvojen je sljedeći

D N E V N I R E D

1. Nacrt Zakona o jedinstvenim načelima i okviru materijalne podrške lica sa invaliditetom,
2. Prijedlog Odluke o prihvatanju zaduženja po Ugovoru o zajmu između Bosne i Hercegovine i Evropske banke za obnovu i razvoj za realizaciju Projekta izgradnja tramvajske pruge Ilidža – Hrasnica,
3. Prijedlog Odluke o prihvatanju zaduženja po Ugovoru o zajmu između Bosne i Hercegovine i Evropske banke za obnovu i razvoj (EBRD) za realizaciju Projekta Javni prijevoz Sarajevo e-Mobility,
4. Informacija o aktivnostima u postupku izdavanja Energetske dozvole za izgradnju VE „Široka Draga“ privrednog društva Imres d.o.o. Livno, sa Prijedlogom zaključka o davanju prethodne saglasnosti u postupku izdavanja Energetske dozvole privrednom društvu Imres d.o.o Livno,
5. Informacija o aktivnostima u postupku izdavanja Energetske dozvole za izgradnju VE „Dževa“ privrednog društva „Vjetroelektrana“ d.o.o. Glamoč sa Prijedlogom

- zaključka o davanju prethodne saglasnosti u postupku izdavanja Energetske dozvole privrednom društvu „Vjetroelektrane“ d.o.o. Glamoč,
6. Informacija sa prijedlogom zaključka o davanju prethodne saglasnosti u postupku izdavanja Energetske dozvole za izgradnju VE „Tušnica“ privrednom društvu Winter Wind d.o.o. Tomislavgrad,
 7. Informacija o primjeni postojeće Srednjoročne strategije razvoja poljoprivrednog sektora u Federaciji BiH u 2023. godini do usvajanja nove Strategije poljoprivrede i ruralnog razvoja 2021.-2027. godina,
 8. Informacija o statusu Agencije za privatizaciju Federacije BiH,
 9. Izbori i imenovanja.

1. Nacrt Zakona o jedinstvenim načelima i okviru materijalne podrške lica sa invaliditetom,

Nacrt Zakona utvrdila je Vlada FBiH.

Nacrt Zakona razmatrala su nadležna radna tijela i dostavila izvještaje.

Ispred Vlade FBiH dodatno obrazloženje dao je ministar Vesko Drljača.

U raspravi su učestvovali: Jasna Duraković, Antonio Sesar, Begajeta Čaušević, Dennis Gratz, Alma Kratina, Mara Đukić, Kenela Zuko, Admir Čavalić, Haris Silajdžić i Dario Knezović.

Sa 72 glasa za, bez glasova protiv i bez uzdržanih glasova, usvojen je slijedeći:

Z A K L J U Č A K

Predstavnički dom Parlamenta FBiH prihvata Nacrt Zakona o jedinstvenim načelima i okviru materijalne podrške lica sa invaliditetom i smatra da može poslužiti kao dobra osnova za izradu prijedloga Zakona.

Zadužuje se predlagač da organizuje i provede javnu raspravu

Zadužuje se predlagač da prilikom izrade prijedloga Zakona uzme u obzir sve prijedloge, primjedbe i sugestije koje su dostavljene ili će biti dostavljene u pisanom obliku.

Admir Čavalić predložio je zaključak. Sa 62 glasa za, bez glasova protiv i jednim uzdržanim glasom, usvojen je slijedeći:

Z A K L J U Č A K

Zadužuje se Vlada FBiH da hitno stupi u pregovore sa predstavnicima Koalicije Unije osoba i organizacija osoba sa invaliditetom u FBiH u cilju unapređenja usvojenog Nacrta Zakona o jedinstvenim načelima i okviru materijalne podrške lica sa invaliditetom.

Pauza sat vremena.

2. Prijedlog Odluke o prihvatanju zaduženja po Ugovoru o zajmu između Bosne i Hercegovine i Evropske banke za obnovu i razvoj za realizaciju Projekta izgradnja tramvajske pruge Ilidža – Hrasnica,

Prijedlog Odluke dostavila je Vlada FBiH.

Prijedlog Odluke razmatrala su nadležna radna tijela i dostavila izvještaje.

U raspravi su učestvovali: Jasmina Bišćević-Tokić, pomoćnik federalnog ministra finansija u Resoru za upravljanje dugom Samir Bakić, Adnan Efendić, Mladen Bošković, Mario Karamatić, Dennis Gratz, Salko Zildžić i Hajrudin Žilić.

Sa 62 glasa za, bez glasova protiv i jednim uzdržanim glasom, Predstavnički dom donio je Odluku o prihvatanju zaduženja po Ugovoru o zajmu između Bosne i Hercegovine i Evropske banke za obnovu i razvoj za realizaciju Projekta izgradnja tramvajske pruge Ilidža – Hrasnica.

Klub zastupnika SDA predložio je zaključak. Sa 53 glasa za 12 glasova protiv i 13 uzdržanih glasova, usvojen je slijedeći:

Z A K L J U Č A K

Zadužuje se Federalno ministarstvo finansija da obaveže po Ugovoru o supsidijarnom zajmu korisnika sredstava da dostavlja izvještaje Federalnom ministarstvu finansija i Parlamentu Federacije BiH o namjenskom utrošku sredstava i toku realizacije projekta. Izvještaj dostavljati svakih šest mjeseci.

3. Prijedlog Odluke o prihvatanju zaduženja po Ugovoru o zajmu između Bosne i Hercegovine i Evropske banke za obnovu i razvoj (EBRD) za realizaciju Projekta Javni prijevoz Sarajevo e-Mobility,

Prijedlog Odluke dostavila je Vlada FBiH.

Prijedlog Odluke razmatrala su nadležna radna tijela i dostavila izvještaje.

U raspravi niko nije učestvovao.

Sa 71 glasom za, bez glasova protiv i bez uzdržanih glasova, Predstavnički dom donio je Odluku o prihvatanju zaduženja po Ugovoru o zajmu između Bosne i Hercegovine i Evropske banke za obnovu i razvoj (EBRD) za realizaciju Projekta Javni prijevoz Sarajevo e-Mobility.

4. Informacija o aktivnostima u postupku izdavanja Energetske dozvole za izgradnju VE „Široka Draga“ privrednog društva Imres d.o.o. Livno, sa Prijedlogom zaključka o davanju prethodne saglasnosti u postupku izdavanja Energetske dozvole privrednom društvu Imres d.o.o Livno,

Informaciju je dostavila Vlada FBiH.

Informaciju su razmatrala su nadležna radna tijela i dostavila izvještaje.

U raspravi su učestvovali: Kadrija Hodžić, Salko Zildžić, Amra Kaljić-Junuzović, Mario Karamatić, Hajrudin Žilić, Haris Silajdžić, Petar Galić, Siniša Dukić i Mahir Mešalić.

Sa 72 glasa za, bez glasova protiv i četiri uzdržana glasa, Predstavnički dom donio je Zaključak o davanju prethodne saglasnosti u postupku izdavanja Energetske dozvole privrednom društvu Imres d.o.o. Livno.

Odbor za energetiku, rudarstvo i industriju predložio je zaključak. Sa 73 glasa za, bez glasova protiv i bez uzdržanih glasova, usvojen je slijedeći:

Z A K L J U Č A K

da se u dnevni red naredne sjednice uvrste: Prijedlog Zakona o energiji i regulaciji energetskih djelatnosti u FBiH, Prijedlog Zakona o električnoj energiji FBiH, i Prijedlog Zakona o korištenju obnovljivih izvora energije i efikasne kogeneracije.

5. Informacija o aktivnostima u postupku izdavanja Energetske dozvole za izgradnju VE „Dževa“ privrednog društva „Vjetroelektrana“ d.o.o. Glamoč sa Prijedlogom zaključka o davanju prethodne saglasnosti u postupku izdavanja Energetske dozvole privrednom društvu „Vjetroelektrane“ d.o.o. Glamoč,

Informaciju je dostavila Vlada FBiH.

Informaciju su razmatrala su nadležna radna tijela i dostavila izvještaje.

U raspravi niko nije učestvovao.

Sa 71 glasom za, bez glasova protiv i jednim uzdržanim glasom, Predstavnički dom donio je Zaključak o davanju prethodne saglasnosti u postupku izdavanja Energetske dozvole privrednom društvu „Vjetroelektrane“ d.o.o. Glamoč.

6. Informacija sa prijedlogom zaključka o davanju prethodne saglasnosti u postupku izdavanja Energetske dozvole za izgradnju VE „Tušnica“ privrednom društvu Winter Wind d.o.o. Tomislavgrad,

Informaciju je dostavila Vlada FBiH.

Informaciju su razmatrala su nadležna radna tijela i dostavila izvještaje.

U raspravi niko nije učestvovao.

Sa 68 glasova za, bez glasova protiv i jednim uzdržanim glasom, Predstavnički dom je donio Zaključak o davanju prethodne saglasnosti u postupku izdavanja Energetske dozvole za izgradnju VE „Tušnica“ privrednom društvu Winter Wind d.o.o. Tomislavgrad.

7. Informacija o primjeni postojeće Srednjoročne strategije razvoja poljoprivrednog sektora u Federaciji BiH u 2023. godini do usvajanja nove Strategije poljoprivrede i ruralnog razvoja 2021.-2027. godina,

Informaciju je dostavila Vlada FBiH.

Informaciju su razmatrala su nadležna radna tijela i dostavila izvještaje.

U raspravi niko nije učestvovao.

Predstavnički dom primio je k znanju Informaciju o primjeni postojeće Srednjoročne strategije razvoja poljoprivrednog sektora u Federaciji BiH u 2023. godini do usvajanja nove Strategije poljoprivrede i ruralnog razvoja 2021.-2027. godina.

8. Informacija o statusu Agencije za privatizaciju Federacije BiH,

Informaciju je dostavila Vlada FBiH.

Informaciju su razmatrala su nadležna radna tijela i dostavila izvještaje.

Ispred nadležnih odbora raspravljali su Admir Čavalić i Slaven Raguž.

Ispred Agencije obrazloženo je dao Drago Vrbić.

U raspravi su učestvovali: Amra Kaljić-Junuzović, Admir Čavalić, Slaven Raguž, i Siniša Dukić.

Sa 72 glasa za, bez glasova protiv i bez uzdržanih glasova, Predstavnički dom usvojio je slijedeći:

Z A K L J U Č A K

Predstavnički dom Parlamentu FBiH zadužuje Odbor za ekonomsku i finansijsku politiku da zajedno sa Vladom FBiH pokuša iznaći rješenje u vezi sa ovom problematikom.

Pod tačkom **9.- Izbori i imenovanja** nije bilo materijala za razmatranje.

Predsjedavajuća je zaključila rad 2. redovne sjednice u 16.17.

Transkript i prijepis transkripta čine sastavni dio Zapisnika.

SEKRETAR
PREDSTAVNIČKOG DOMA
PARLAMENTA FEDERACIJE BIH

Ivan Miličević

PREDSJEDAVAJUĆA
PREDSTAVNIČKOG DOMA
PARLAMENTA FEDERACIJE BIH

Mirjana Marinković-Lepić

